



Poschiavo d'antruras cun vista sin il Piz Varuna.



L'enconuscent viaduct circular da la Viafier retica a Brusio.

Poschiavo e Brusio – las duas vischnancas dal Puschlav

■ Il viadi nà dal Pass dal Bernina maina l'emprim sur la costa sanestra da la Val Puschlav (u cun il tren sur l'Alp Grüm) a San Carlo e Poschiavo. La via cuntinuescha sur Le Prese ed il Lago di Poschiavo a Miralago che furma il cunfin tranter las duas vischnancas. Il vitg da Brusio vegn flancà da vart sanestra da la baselgia da San Romerio e da Viano, da vart dretga da Cavajone. Il pli giudim il Puschlav, al cunfin tar la Vuclina, sa chatta il vitget da Campocologno.

San Carlo

Abitadi en la vischnanca politica da Poschiavo, oriundamain Aino. A San Carlo appartegneva l'entir intschess al nord da Poschiavo fin al Pass dal Bernina, vul dir la *Contrada* interna da Poschiavo ch'era responsabla per tschertas lavurs cuminas, oravant tut per il mantegniment da las vias. A partir dal 1612 ha existì ina chaplania a San Carlo. La baselgia, consecrada a s. Carlo Borromeo, è vegnida erigida il 1613. Il 1908 è San Carlo daventà ina curazia, il 1941 ina plaiv. L'abitadi maina ina scola primara. *Adolf Collenberg*

Poschiavo

Vischnanca politica, circuit Puschlav, district Bernina, situada en ina foppa lada da la part sura dal Puschlav. 824 in *Postclave* (copia); 1140 de *Puschlavio*. Poschiavo cumpiglia, ultra dal lieu principal Poschiavo (il Borgo), las fracziuns dad Angeli Custodi, San Carlo, Cologna, S. Antonio (Li Curt), Annunziata, Prada, Pagnoncini, Cantone, Le Prese e Miralago (parzialmain anc sin territori da la vischnanca da Brüschi). Vischnanca paritetica (maioritad catolica) e da lingua taliana. 1850 2888 abitants; 1900 3102; 1950 4034; 2000 3225. La structura organisatorica da la vischnanca è attestada per Poschiavo gia en il 12avel tschientaner. Ils emprims fragments da statuts communalns dateschan dal 1388. Ils Matschenostas avevan la suveranità territoriala en il 12 e 13avel tschientaner, ils Viscontis tranter il 1350 ed il 1406, ed a partir dal 1408 ha Poschiavo fatg part da la Lia da la Chadé. Ils Puschlavins han elegi l'emprima giada sco suverans in podestà (mastral) il 1524. La vischnanca da Brüschi è sa separada da Poschiavo il 1851.

L'onn 824 vegn menziunà per l'emprima giada ina baselgia cun dretg da batten, il 1286 la baselgia principala da S. Vittore. La baselgia è vegnida reconstruida en stil gotic il 1497–1503, alura transfurmada en stil baroc ed elevada il 1690 ad ina baselgia collegiata. Brüschi ha appartegnì a partir da ca. l'onn 1400 a la plaiv da Poschiavo ed è sa separada

da quella il 1501. La cuminanza reformada da Poschiavo, constituida enturn il 1550, ha stuì fugir il 1623 da las persecuziuns en connex cun ils Scumbigls grischuns ed ha pudì turnar ed eriger in'atgna baselgia pir suenter la sentenza da cumpromiss da las Trais Lias dal 1642. Il 1629–38 è vegnida fundada la claustra da las ursulinas ch'è passada il 1684 a l'Urden dals augustins. La scola publica reformada è vegnida averta il 1824–25, quella catolica (l'Istituto Menghini) il 1830. Las duas scolas èn restadas separadas tenor confessiun fin il 1967. La pravenda catolica appartegneva a l'uvestgieu da Com ed è passada a la diocesa da Cui- ra pir il 1870.

Cun la conquista da la Vuclina tras ils Grischuns il 1512 è l'impurtanza strategica e commerciala e quella per il transport s'augmentadas a moda considerabla. La perdita da la Vuclina (1797) ha indebli fermamain l'economia da Poschiavo, basada durant tschientaners sin l'agricultura e l'allevament da muvel. En il 19avel tschientaner èn emigrads numerus Pusciavins en auters pajais da l'Europa ed en l'Australia. En la segunda mesad dal 19avel tschientaner han erigi pastiers e cafetiers emigrads en la Spagna ed en il Portugal numerusas villas a Poschiavo, daventadas enconuschantas sut il num «quartier spagnol».

In modest svilup industrial, avant la flurizium turistica, han ins gi enturn il 1850 cun ina bieraria (1850/52–1929) ed ina fabrica da tubac (avant il 1840 fin il 1866). Il 1913 è vegnì avert in ospital, reconstrui en la zona da S. Sisto il 1927 e restructurà cumpletamain il 2005. La tipografia Landolfi, endrizzata il 1547, è stada l'emprima dal Grischun. Sin il plaun cultural e sin il champ da la furmazium vegnan las offertas pussibilitadas dal Progetto Poschiavo il 1995–2001 cuntinuadas dal Polo Poschiavo. Il 2005 lavuravan 60 % da las persunas cun activitad da gudogn a Poschiavo en il sectur terziar. Grondas inunaziuns ha Poschiavo subì en ils onns 1566, 1572, 1834 e 1987. Meglieraziun generala 1962–2007. *Arno Lanfranchi*

Le Prese

Abitadi situà en la vischnanca politica da Poschiavo, colonisà en il temp medieval tardiv. Construcziun da la chasa da cura 1856, meglieraziun ed amplificaziun da las installaziuns dals bogns termals 1861. Dapi il 1874 pravenda da S. Francesc, da la quala fa part era l'acclun Cantone. Le Prese sa recumandava sco lieu d'acclimatisaziun ideal surtut pervia da sia posiziun tranter l'Italia dal Nord ed ils instituts da cura da l'Engiadina. Ils bogns sulfurics e termals vegniavan frequentads

stediain fin il 1914. La stagiun turistica dura dal matg fin mez october. Il vitg ha in'atgna scola primara. *Adolf Collenberg*

Brüschi (Brusio)

Vischnanca politica, circuit Brüschi, district Bernina, situada en la part sut dal Puschlav. Brüschi cumpiglia ils aclauns da Campocologno, Zalende, Campascio, Brüschi, Piazza e Miralago a la via dal Bernina ed ils abitadis da Viano e Cavajone situads aut sur la val. 1106 *Bruse*, 1212 *Brusio*, tal. Brusio (uffizial). 1803 620 abitants; 1850 1000; 1900 1199; 1950 1528; 2000 1202.

La confraternità da San Romerio, domiciliada sur Brüschi e menziunada per l'emprima giada il 1055, ha influenzà fermamain la colonisaziun ed urbanisaziun a Brüschi. Gia il 1212 è Brüschi daventada ina vischnanca autonoma cun in agen decan. En il 13avel tschientaner è l'entir Puschlav passà sco feud a l'uvestgieu da Cui- ra. En il decurs dal 14avel tschientaner è la vischnanca da Brüschi vegnida incorporada a quella da Poschiavo che s'administrava per gronda part autonomamain. Cun la conquista da la Vuclina tras ils Grischuns èn vegnids annectads era ils aclauns da Campocologno (1518) e Zalende (1526). Il 1610 vuleva Brüschi sa separar da Poschiavo, quai ch'è dentant reussì definitivamain pir il 1851. Il 1863 èn vegnids attribuids a Brüschi la val laterala da Sajo (fin alura talian) e l'abitadi da Cavajone. Ecclesiasticamain ha Brüschi appartegnì a la plaiv da S. Lorenzo a Villa di Tirano (Vuclina), pli tard a quella da S. Vittore a Poschiavo. Il 1271 vegn menziunà per l'emprima giada la baselgia da la S. Trinitad, Brüschi è dentant daventada ina plaiv independenta pir il 1501. Vischnanca reformada il 1590, cun in'atgna baselgia (construida il 1645). En il 17avel tschientaner èn vegnids expulsads ils reformads che faschevan il 2000 anc damain che 10% da la populaziun. Il 1870 è sa separada la plaiv catolica da Brüschi da la diocesa da Com ed è vegnida incorporada a l'uvestgieu da Cui- ra. Separaziun da la plaiv da Campocologno 1966. Las Ovras electricas Brüschi (1906) e la Viafier dal Bernina (1910) han effectuà in svilup economic considerabel. Il commerzi da vin, fritga, legums e tubac ha cumenzà a flurir. En ils onns 1960 èn s'aggiuntads l'industria da textilias ed il traffic sur cunfin (ca. 280 pendularis d'ordifer); tutina è sa reduci il dumber da las persunas cun activitad da gudogn a Brüschi da 730 il 1920 a 450 il 1980. Il 2005 dumbrava la vischnanca puspè 698 occupads (30 lieus da lavur en il sectur primar, 24 en il sectur secundar e 70 en il sectur terziar). *Fernando Iseppi*

San Romerio

Baselgia en la vischnanca da Brüschi ch'ha appartegnì durant in tschert temp a la plaiv da Villa di Tirano e ch'è actualmain proprietad da la vischnanca da Tiraun. San Romerio (antruras S. Remigio) è attestà per l'emprima giada il 1106 (*ecclesia sancti Romedii*). Ella è vegnida consecrada tras l'uvestg da Com, Guido Grimoldi, ch'ha concedì la regla da s. Augustin als *servitores de ecclesia* e reglè las relaziuns cun il clerus da la baselgia-mamma da Villa di Tirano. La tradiziun orala locala ha affidà l'emprim insediament al moviment dals umiliads, ma i sa tracta probablamain d'ina fundaziun episcopala cun la funcziun d'ospizi a la via tranter Tiraun e Poschiavo. San Romerio disponiva d'in territori da ca. 15 km² che cunfinava cun las vischnancas da Poschiavo, Brüschi, Tiraun, Tovo e Grosotto. Il 1237 èn vegnids unids ils bains ed il chapitel da San Romerio cun la comunitad e cun l'ospital da la baselgia da S. Perpetua di Tirano. Ils fraters e las soras da las communitads vegniavan guvernads d'in rector u d'in plevon e sustegnids da numerus famegls en l'urbanisaziun dal terren. Il 1427 è vegnida midada la baselgia, per mancanza da fraters e soras, en ina commenda. Il 1517 ha incorporà il papa Leo X ils bains al santuari da la Madonna di Tirano, accordond a Tiraun il possess ed il dretg da patronadi. *Arno Lanfranchi*

Viano

Abitadi da la vischnanca politica da Brüschi, situà a 1280 m aut sur la val. 843 *Milvianum*, 1187 *Vian*. Per ina precursura romana da la via da sauma dal temp medieval da Tiraun sur Viano e S. Remigi al Pass dal Bernina mancan las cumprovas. Viano ha appartegnì fin il 1387 a Tiraun, alura a Brüschi. Urbanisaziun intensiva tras ils convers (fraters laics) da S. Remigi en il 12 e 13avel tschientaner. Prads e culms domineschan la cuntrada. Il cunfin tranter Tiraun e Brüschi, fixà da las Trais Lias il 1526, n'è betg vegnì renconuschì da Tiraun. La scola primara exista dapi il 1896. L'emprima via charabla a Viano è vegnida construida il 1920. *Adolf Collenberg*

Cavajone

Abitadi sparpaglià en la vischnanca politica da Brüschi, situà a 1200–1500 m sin la spunda sanestra dal Sajo. 1233 *Cavalono*. 1873 103 abitants (14 famiglias senza naziunalitad); 1950 65; 1990 13. En il temp medieval complex dad aclas vuclinais en possess da la chaplutta da Nossadunna da Tiraun. A l'entschatta dal 16avel tschientaner èn

ils cunfins vegnids spustads en favur da Brüschi. Cavajone è restà in abitadi da stad fin il 17/18avel tschientaner. La chaplutta da la S. Crusch, construida il 1777, ha appartegnì fin viaden il 19avel tschientaner a la plaiv da Tiraun, alura a Brüschi. Tranter il 1797 ed il 1815 n'eran ils cunfins a Cavajone ed en la Val dal Saent danovamain betg clers. La chaplutta da Nossadunna aveva vendi a ses temp ses bains a famiglias vuclinais residentas l'entir onn u la stad a Cavajone. Fin il 1874 è Cavajone stà in abitadi senza appartegnientscha statala e cun quai liber da tagliar. Fin il 1874 ha el era furmà ina basa tradiziunala da cuntrabandiers senza organisaziun communal, cun excepziun d'ina guardia champestra e d'in pendrader (da muvel). La via a Cavajone è vegnida renovada il 1968. Il 1997 è vegnida constituida la Fundaziun Pro Cavajone. *Adolf Collenberg*

Campocologno

Culegna en la vischnanca politica da Brüschi, situada al cunfin cun la Vuclina. Tenor la tradiziun orala consistiva Campocologno oriundamain da trais aclauns. En il temp medieval ha appartegnì la culegna a la giurisdicziun da Tiraun. Da quel temp predominava qua l'agricultura. En ils onns 1429–1521 è il cunfin tranter Brüschi e la Vuclina vegnì spustà da la tur da Piattamala vers il sid, da maniera che Campocologno è daventà ina part da la vischnanca da Brüschi. Il 1526 èn vegnids rectificgads ils cunfins tranter Poschiavo e Tiraun. Il 1615 è attestada per l'emprima giada la *contrada di Zalende Campocologno* en in contract da partiziun cun Tiraun. Ils da Campocologno faschevan tradiziunalmain commerzi cun la Vuclina (tranter auter martganzia da cuntrabanda). Il 1902–10 è vegnida construida a Campocologno la centrala da las Ovras electricas Brüschi (da quel temp la pli gronda en l'Europa, reconstruida il 1971), il 1910 ina fabrica da conservas. Ferma emigraziun dapi il 1950. L'antieriura chaplania da Brüschi è ina plaiv dapi il 1964. *Adolf Collenberg*

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.